

Gunghcwngz: Hawmih Gvanh-di Hozdung Hoenghhwdhwd

恭城：关帝庙会民俗文化活动盛况空前

6 nyied 19 hauh, Gunghcwngz Yauzcuz Swciyen gawjbanh Hawmih Gvanhdi vwnzva minzsuz hozdung. Fanh lai vunz cunzyouz, baiq boux cienglingj okmingz Sanhgoz Gvanh Yij, gouz guekgya daibingz, lwgminz anonj. Gunghcwngz moix gek sam bi gawjbanh baez hozdung ndeu.

Baez hawmih hozdung neix cawjdaez dwg “Gvanhdi Comz Eiq · Gunghcwngz Gyaendei”. Gvangjdungh, Huznanz, Yanggangj, Daizvanh nem ndaw gih raeuz daengj gij hawmih donzdi camgya hozdung haenx caeuq bouxseng’ eiq daeuj camgya, caezdoengz dijen gij daegsaek minzsuz hozdung Gunghcwngz.

Gunghcwngz Hawmih Gvanhdi youq 2010 nienz ndaej lied haeuj swcigih feihvuciz vwnzva yizcanj mingzloeg. (Mung Vaz Dangz Yizmingz)



▲Gvanhdi cunzyouz.



▲Gyoengavunz fouxlunz baiq Gvanh Yij cienglingj.



▲Muzgwz Yangh nungminz ciengq diuzgo 《Cauhbingz Gyaendei · Lajmbanj Seuqsak》.

Cauhbingz Nungminz Doxdax Ciengq Go Beij Bonjsaeh 昭平农民歌手大赛展风采

Mboengqgonq, Cauhbingz Yen gawjbanh 2013 nienz “Ngux Nyied Cibsam” Vwnzva Yisuzcez Nungminz Ciengq Go Doxdax, daengx yienh 10 lai aen yanghein 20 lai boux nungminz senjsouj daj gwnz haenznaz gyaеuj reih, gwnz gencuz gunghdi byaij hwnj gwnz daizfoux, gyoengqde youq gwnz daizfoux baijyienh gij ciengq go bonjsaeh swheij, yungh gij singgo goksasa haenx danqhaenh hong “cinghseuq lajmbanj”. (Liuz Feih)

Gvanyangz Yen Gaemmaenh Cingzcik Ndei Hong “Cinghseuq Lajmbanj”

灌阳县巩固“清洁乡村”成果

Vihliux dawz gij hong “Gvanyangz gyaendei · lajmbanj seuqsak” dangguh hong bingzseiz daeuj guh, caenh’ itbouh gaemmaenh cingzcik ndei gij hong “cinghseiq” haenx, Gvanyangz Yen caijciy “baihgwnz hawj di, cwngfuj bang di, ginzcong rom di” aen fuengsik neix, daihdamj cingjhab yungh ngaenz, baujcingq miz ngaenz daeuj guh gij hong “Gvanyangz gyaendei · lajmbanj seuqsak”. Gungh rom ndaej 400 fanh maenz bang 7 aen yanghein guh loz coemh nyapnyaj; cwngfuj ok 110 fanh maenz guh yen, yanghein, cunh vanzvei sezsih gensez caeuq boiq hawj vanzvei gunghyinz. (Dangz Linzcunh)



Lwgminz Gvei Daiz Caez Ndaem “Faexdoengzsim”

桂台两地人民共植“同心树”

6 nyied 20 hauh, Denzyangz Yen Douzdangz Cin daiyauj caeuq Daizvanh Vahlenz Yen Funghbinh Yangh boux daiyauj daeuj Denzyangz cunzcam haenx caez ndaem “faexdoengzsim”. Denzyangz Yen Douzdangz Cin caeuq Daizvanh Vahlenz Yen Funghbinh Yangh daj 2010 nienz giet baenz youjhauj yanghein daeuj, baengh Gvei Daiz Gingham Vwnzva Hoz-coz Lundanz caeuq Cungguk-Dunghmungz Bozlanjvei daengj aen bingzdaiz neix, lai baez gaihcanj vwnzva, ginghci gyauhliuz hoz-coz, gyagiengz doxhwnj, mboujduenh gyalag gamjcingz, saedyienh caezgya ndaej leih’ ik baenzfouq .

(Luz Gez)



Yungzanh Laebbaenz Doih Mehmbwk Hoh Raemx Seuq

融安成立女子水上保洁队

Yungzanh Yen dieg youq duenh baihgwnz Dahcuhgyangh, dwg dieg rangh raemx cungyau baujhoh ndeu. Vihliux baujciz ndaw raemxdah seuqingh, Yungzanh Yen laebbaenz aen doih mehmbwk baujhoh raemx seuq ndeu, moix ngoenz fucwz lau hwnj gij doxgaiq fouz youq gwnz raemx haenx. Gyoengq mehmbwk neix yungh song fwngz gaenxgyaek gyoengqde, dawz vanzging Dahyungzyangh guh ndaej seuqsak, baujcingq gyoengq ginzcong youq duenh dah baihlaj haenx ndaej gwn raemx seuqsak. (Yungzyungz)

